



## IS-BWYLLGOR TRAFNIDIAETH STRATEGOL

1 Hydref, 2024

**TEITL:** Cynllun Trafnidiaeth Rhanbarthol: Diweddariad cynnydd ac argymhellion

**AWDUR:** Alwen Williams, Prif Weithredwr Dros Dro

### 1. PWRPAS YR ADRODDIAD

1.1. Pwrpas yr adroddiad hwn yw cyflwyno diweddariad ar y gwaith i ddatblygu'r Cynllun Trafnidiaeth Rhanbarthol (RTP) sy'n cynnwys sefydlu'r strwythurau gweithredol angenrheidiol i alluogi'r CBC i gyflawni ei ddyletswydd statudol.

### 2. Y PENDERFYNIAD A GEISIR

2.1. Argymell bod:

- Datganiad gweledigaeth Cynllun Trafnidiaeth Rhanbarthol Gogledd Cymru
- Amcanion SMART
- Themâu trawsbynciol

a fanylir arnynt yn **Atodiad 1** yn cael eu cyflwyno i CBC y Gogledd i'w mabwysiadu a'u cynnwys yn Achos Dros Newid y Cynllun Trafnidiaeth Rhanbarthol a Chynllun Trafnidiaeth Rhanbarthol drafft Gogledd Cymru. Ac i ofyn i'r Achos Dros Newid drafft gael ei ddiweddarau a'i gyflwyno i'r is-bwyllgor yn ei gyfarfod nesaf.

2.2. Nodi'r prif ddyddiadau cerrig milltir fel y'u cyflwynir yn **Atodiad 2** ar gyfer cyflawni'r Cynllun Trafnidiaeth Rhanbarthol a chyfarwyddo gwaith pellach i gyflawni'r prif gerrig milltir yn unol â chanllawiau Llywodraeth Cymru.

2.3. Nodi'r Cynllun Ymgysylltu â Rhanddeiliaid drafft yn **Atodiad 3**, y mae'n rhaid ei baratol i gefnogi'r CTRh, ac i argymell unrhyw ystyriaethau ychwanegol y dylid eu cynnwys.

2.4. I nodi y bydd y swyddog arweiniol yn uwch swyddog â chyfrifoldeb am drafndiaeth ym mha bynnag Awdurdod a gynrychiolir trwy'r Cadeirydd etholedig. Bydd y swyddog arweiniol hwn yn gweithredu fel cyswllt rhwng y Grŵp Trafnidiaeth Ymgynghorol a'r Is-bwyllgor hwn.

### 3. Y RHESWM DROS Y PENDERFYNIAD

3.1. Mae'n ofynnol i CBC y Gogledd gynhyrchu Cynllun Trafnidiaeth Rhanbarthol (CTRh) a Chynllun Cyflawni Trafnidiaeth Rhanbarthol (RTDP) yn unol â chanllawiau Llywodraeth Cymru erbyn 31 Mawrth, 2025. Er mwyn cyflawni hyn, dylai'r Is-bwyllgor Trafnidiaeth ystyried cydrannau datblygol y CTRh drafft ac arwain y gwaith i gael ei gymeradwyo'n derfynol gan gynnwys cytuno ar y camau a'r dogfennau gofynnol ar gyfer ymgynghori'n gyhoeddus.

- 3.2. Mae gwaith yn mynd rhagddo gyda chefnogaeth ymgynghorwyr, ARUP, sydd wedi creu map ffordd mewn perthynas â chamau cyflenwi critigol (**Atodiad 2**), a fydd yn cael ei ddatblygu i sicrhau bod materion yn cael sylw priodol drwy'r Is-bwyllgor ac yn cael eu cyfeirio i'r CBC mewn modd amserol er cymeradwyaeth.

#### 4. CEFNDIR AC YSTYRIAETHAU PERTHNASOL

- 4.1. Mae Deddf Llywodraeth Leol ac Etholiadau (Cymru) 2021 yn cynnwys darpariaeth ar gyfer creu Cyd-bwyllgorau Corfforedig (CBCau) a ffurfiwyd i hyrwyddo cydweithredu rhanbarthol trwy fframwaith cyson a reolir yn ddemocrataidd. Mae'n ofynnol i'r CBCau gydymffurfio â holl ddyletswyddau cyrff cyhoeddus a chânt gyfrifoldeb statudol dros baratoi Cynlluniau Trafnidiaeth Rhanbarthol (CTRh)<sup>1</sup>. O ran y Gogledd, rhaid i'r CBC ddatblygu polisiau trafndiaeth i weithredu Llwybr Newydd: Strategaeth Trafnidiaeth Cymru 2021<sup>2</sup>, gan ddarparu gweledigaeth hirdymor ar gyfer y 25 mlynedd nesaf. Mae aelodaeth CBC y Gogledd yn cynnwys cynrychiolwyr o chwe ardal awdurdod lleol Ynys Môn, Wrecsam, Conwy, Sir y Fflint, Sir Ddinbych, a Gwynedd, ac Awdurdod Parc Cenedlaethol Eryri.
- 4.2. Penodwyd Arup gan Uchelgais Gogledd Cymru ar ran Cyd-bwyllgor Corfforedig y Gogledd ym mis Mawrth 2024 i ddarparu cymorth ymgynghorol i ddatblygu'r CTRh.
- 4.3. Cyflwynwyd yr Achos Dros Newid drafft ar gyfer y Cynllun Trafnidiaeth Rhanbarthol, gan gynnwys y weledigaeth a'r amcanion drafft, i'r CBC ar 22 Mawrth, 2024. Ers hynny, mae'r amcanion hyn wedi'u mireinio a'u cryfhau i bedwar amcan penodol, mesuradwy, cyraeddadwy, realistig ac amserol (SMART) gyda phum thema drawsbynciol sy'n cael eu hystyried yn hanfodol er mwyn helpu i gyflawni'r weledigaeth a'r amcanion. Mae Drafft Diweddaraf Achos Dros Newid y Cynllun Rhanbarthol wedi'i gynnwys fel **Atodiad 4**.
- 4.4. Bydd y gwaith i gefnogi datblygu polisi'n cael ei gyflawni gan yr Is-bwyllgor Trafnidiaeth Strategol, ac ar 21 Mehefin, 2024 cadarnhaodd y CBC benodiad aelodau cyfetholedig i'r Is-bwyllgor Trafnidiaeth, ac nid oes unrhyw newidiadau wedi'u hysbysu yn y cyfnod interim.

#### 5. GOBLYGIADAU ARIANNOL

- 5.1. Datblygiad y CTRh yw un o ddyletswyddau craidd y CBC, ac mae cyllideb yn ei lle ar ei gyfer.

#### 6. GOBLYGIADAU CYFREITHIOL

- 6.1. Mae'r goblygiadau cyfreithiol mewn perthynas â llywodraethu yng ngorff yr adroddiad.

---

#### ATODIADAU:

<b>Atodiad 1:</b>	Gweledigaeth, Amcanion a Themâu Trawsbynciol Arfaethedig
<b>Atodiad 2:</b>	Map ffordd yn amlinellu camau cyflawni critigol
<b>Atodiad 3:</b>	Cynllun Ymgysylltu â Rhanddeiliaid
<b>Atodiad 4</b>	Drafft Achos Dros Newid y Cynllun Trafnidiaeth Rhanbarthol

<sup>1</sup> Mae'r CBC hefyd yn gyfrifol am baratoi Cynlluniau Datblygu Strategol

<sup>2</sup> Mae Llwybr Newydd: Strategaeth Trafnidiaeth Cymru 2021 - ar-lein yn: <https://www.gov.wales/llwybr-newydd-wales-transport-strategy-2021>

---

**YMATEB Y SWYDDOGION STATUDOL:**

**i. Swyddog Monitro:**

"Mae'r swyddogaeth o ddatblygu Cynllun Trafnidiaeth Rhanbarthol yn bŵer a arferir gan y CBC, ac mae'r adroddiad yma'n amlinellu rhai o'r elfennau allweddol sy'n angenrheidiol i ddatblygu'r Cynllun. Nid oes gennyf unrhyw wrthwynebiad gyda chynnwys yr adroddiad o ran priodoldeb."

**ii. Swyddog Cyllid Statudol:**

"Gallaf gadarnhau bod gan y Cyd-bwyllgor Corfforedig gyllideb wedi'i chlustnodi ar gyfer datblygu'r Cynllun Trafnidiaeth Rhanbarthol. Nid oes gennyf wrthwynebiad i'r penderfyniad a geisir."